



**JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL**

Komunikadu ba Imprensa

**Períodu : Maiu 2011
Edisaun 01 Juñu 2011**

Provizaun Artigu 125 Kódigu Prosesu Penál kontinua sai obstáklu ba vítima violénsia doméstika

Iha loron 24-26 Maiu 2011, JSMP hala'o monitorizasaun ba prosesu julgamentu sira iha Tribunál Distritál Oe-Cusse (TDO). Durante aktividade monitorizasaun loron tolu nian laran, JSMP observa katak prosesu julgamentu hahú tarde ka la tuir oráriu ne'ebé determina ona. Ho fraze seluk, katak julgamentu ne'ebé hala'ó la tuir oráriu ne'ebé tribunál defini tiha ona. Mesmu nune'é kazu hotu ne'ebé marka ona iha agenda konsegue hala'ó julgamentu.

Tuir oráriu tribunál nian, iha kazu hamutuk 11 ne'ebé mak atu julga no iha kazu ida mak hetan julgamentu dala rua hodi rona depoimentu husi sasin. Entre kazu 11 ne'e, iha kazu 8 mak rejista nu'udar krime ho natureza violénsia doméstika ka krime hasoru konjuje.

Julgamentu ba prosesu hirak ne'e, hotu-hotu ho kompozisaun tribunál singulár ne'ebé prezide husi juiz Dr. Alvaro Freitas, ministériu públiku representa rotativamente entre/husi Dr. Jacinto Babo no Dr. Afonso Lopes, enkuantu defensor públiku Dr. Calisto Tout representa arguidu sira no kazu ida seluk akompaña hamutuk ho Dr. Raimundo Efi, husi F-FSO.

JSMP sente haksolok katak mesmu iha loron 3 nia laran deit, Tribunál ne'e, konsegue maneija atu julga kazu hamutuk 11 no kada loron pelo-menus iha kazu 4 mak tribunál hala'ó julgamentu. Realidade ne'e, hatudu tribunál refere nia produtividade hodi asegura katak administrasaun judisiáriu nian funsiona ho efetivu hodi hatan ba espetativa públiku nian konabá justisa.

Durante observa julgamentu kazu ho natureza krime violénsia doméstika sira, JSMP deskobre katak kuaze vítima no testamuña sira ne'ebé tribunál notifika atu fo sira nia depoimentu, sira hotu-hotu ezerse sira nia direitu nonok no rekuza ato fo depoimentu hasoru sira nia membru familia, bazeia ba artigu 125 Kódigu Prosesu Penál (KPP).

Direktur Ezekutivu JSMP, Luis de Oliveira Sampaio haktuir *katak mesmu JSMP haksolok tanbá juiz sira kumpri duni sira nia obrigasaun atu pronunsia artigu 125 KPP antes julgamentu hahu hodi fo opsaun ba parte sira, maibe juiz ka tribunál la klarifika implikasaun ka efeitu husi artigu ne'e kuandu sira hotu ezerse sira nia direitu atu nonok no rekuza atu fo sira nia depoimentu hasoruautór ne'ebé diskonfia komete krime hasoru sira.*

Liu tan nia hatutan, JSMP kumpriende katak mesmu tuir lei, partikularmente iha KPP, la tula obrigasaun ruma ba meritismu juiz sira atu halo nune'é, maibe hare ba realidade ne'ebé iha, JSMP hanoin katak iha nesesidade ba tribunál atu esplika no klarifika implikasaun husi artigu 125 KPP ba vítima no testamuña sira iha kazu sira ne'ebé involve krime ho natureza violensia bazeia ba jeneru.

Tuir Artigu 125 Kódigu Prosesu Penál konabá rekuza lejítima atu fó depoimentu defini katak :

1. *Iha direitu atu lakohi fo depoimentu :*
 - a). *Arguidu nia dexendente, axendente, maun ka alin, afin to segundu grau, adotante, adotadu, ka kónjuje :*
 - b). *Arguidu nia fen ka laen no ema ne'ebé moris ho nia ka moris tiha ona ho nia hanesan fen-ho-laen, konabá faktu ne'ebé akontese durante kazamentu ka koabitasau ne'e.*
2. *Entidade competente atu simu depoimentu tenke fo-hatene ba ema sira referidu iha numeru anterior katak sira iha direitu atu lakohi fo depoimentu; selae, iha nulidade.*

JSMP konkorda katak tribunál iha obrigasaun atu pronunsia artigu 125 KPP antes hahu prosesu julgamentu, selae bele iha nulidade, maibe JSMP enkoraza meritismu juizes iha tribunál sira atu tetu realidade hirak ne'e hodi klarifika efeitu husi artigu ne'e ba vítima no testamuña sira atu deskobre justisa. Aliende ne'e, tribunál tenke konsidera mós ba artigu 118 KPP ne'ebé defini konabá regra jerál konabá lezada nia deklarasaun ne'ebé hatur obrigasaun ba lezadu/vítima sira atu fo sai verdade ba kazu ne'ebé sira apresenta ona ba autoridade judisiáriu sira.

Antes ne'e, iha fulan Dezembru tinan 2009, JSMP hamutuk ho Fokupers, lansa ona relatóriu ida konabá ho provizaun artigu 125 KPP relasiona ho komemorasaun loraon 16 Ativismu Violénsia Kontra Feto.

JSMP rejista iha okaziun barak durante halo monitorizasaun iha tribunál katak kazu sira hotu ne'ebé mai ho natureza violensia doméstika maioria vítima mak sai testamuña ba nia an rasik. Tanbá ne'e JSMP dúvida kuandu iha kazu sira hanesan ne'e, parte interesadu sira decide nonok no ka rekuza atu la fo sira nia depoimentu, oinsa mak tribunál bele deskobre faktus no produz provas ba kazu ne'e no hari justisa ba vítima.

JSMP fiar katak maioria vítima sira nonok ka rekuza atu fo sira nia depoimentu iha tribunál, laos tanbá sira kumpriende ho klaramente artigu 125 KPP, maibe psikolojikamente sira iha pozisaun ida dilematiku atu hili entre kontra sira membru ne'ebé komete krime hasoru sira ka hili nonok deit. Provizaun Artigu 125 ne'e hatur vítima no testamuña sira iha pozisaun ida ne'ebé dilematiku.

Durante loraon 3 ne'e, Tribunál Distritál Oe-Cusse hala'ó julgamentu ba kazu krime simples hamutuk kazu 11. Husi totál ne'e, kazu 8 kategoria ba kazu krime ho natureza violénsia doméstika. Entre totál kazu 8 refere iha kazu 4 maka involve autór nu'udar arguida. Kazu ne'e bele justifika ba públiku katak violénsia doméstika la'ós komete deit husi mane maibé iha potensia atu komete mós husi feto. Realidade hirak ne'e, hatudu katak Lei Violénsia Doméstika Nú. 7/2010 ne'ebé vigora ona iha fulan Jullu 2010 la'ós atu kondena deit mane ne'ebé sai

nu'udar autór hanesan maioria kazu sira tama ba tribunál, maibé ba mós membru família sé deit ne'ebé komete violénsia hasoru membru família seluk iha ambiente doméstika nia laran, tuir Lei Kontra Violénsia Doméstika haruka.

JSMP hein katak iha futuro, tribunál sira bele aprende husi esperensia hirak ne'e, no tenta atu interpreta provizaun artigu 125 KPP iha kontestu ne'ebé benefisia interese justisa nian, duque kexi-an deit ba regra ne'ebé iha pontensia lori kauza injustisa ba grupu vulneravel sira.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883